

翰林院修撰舒芬



勅命

奉

天承運

皇帝勅曰文章之任班資

特重于翰林國史之官
筆削首稱乎修撰故必
極衣冠之選抑將爲臺
閣之儲旣越常流宜承
殊典爾翰林院修撰舒

芬學識精醇性資端介
文魁天下臚列詞垣編
摩稱秉筆之公考校號
得人之盛比懷忠憤嘗
抗疏而謫官旋值新朝

遂賜環而進祿賢名大
振慶典方行可無寵章
以示褒勸茲特進爾階
儒林郎錫之勅命於戲
陳仁義格君心亦旣資

於勸講罄謀猷禪治道
尚有待於延登益懋乃
庸用光朕命欽哉

勅命

嘉靖二年七月初五日

之寶

翰林院修撰

贈左春坊左諭德謚文節

舒芬

誥命

奉

天承運

皇帝制曰國家優禮儒英
崇獎直節未究生前之
用必隆身後之褒匪特
酬忠亦以示勸爾翰林

院修撰舒芬學殖深醇
行修端潔軒對檀龍頭
之譽廬居戢鴻羽之儀
志謝飽溫道先敬義陳
謹言而逆耳自許孤忠

持正論以犯顏寧甘三
黜危明憂治目前追四
諫之芳斷鞞叫闈領下
奮再批之勇齎志以歿
直氣如生茲特贈爾爲

左春坊左諭德謚文節
錫之誥命於戲身抑而
揚實行推

三朝之聖論久而定榮名
垂百世之光英爽有知

庶其歆服

制

誥

萬曆拾陸年伍月拾捌日

之

寶

舒梓溪先生文鈔序

宋歐陽公文章經濟天下翕然宗之荆舒繼起摘辭雖工掩於相業愛而傳者罕矣方是時二程在朝忠言入告上每俯躬喜納風及用舍亦勤首肯然典禮法度一變雖異誘諄切莫之能繹也臣從善則可以善君吁難矣哉

毅皇帝豫遊時史官敢諫者惟梓溪舒先生一人雁杖後病臥院中掌院者懼禍使人標出

之先生屹不爲動曰吾官于此當死于此旣
謫閩裹瘡就道或勸俟痊先生曰死吾分也
敢少留耶宅憂扶柩自江而湖忽雲垂波立
舟楫危甚爲文籲祭風濤頓息人服其精誠
于時再諫再杖抵家則沒矣年四十有四爾
謂之烈丈夫者非邪平生清苦家無立壁儲
御史良材爲小築會城居其妻孥佐曩歲過
之二子奉奏出其文集相示於乎先生勵志
聖賢之學氣節文章蓋餘事也江右大魁惟
一峰以道鳴世先生實繼之其策名

清時同令德榮問同官止脩撰抱道而終又同
雖儕之伊洛諸賢可也夫豈徒以文傳者哉
憶歲丙子偕陵陽梅君百一北上偶論武王
代殷歲在鶉火通考象緯弗載因推步之歲
自烏帑旅于龍首我

聖祖殄平僞漢丁未改元星紀吳分也壬午靖
難析木燕分也福德所在其應如響可弗詳
乎梅嘆曰向見國裳亦論到此佐自是知先

生比入史館先生復官造

朝相見握手謂曰吾識君於百一久矣自是過從驩甚嘗曰心術與學術相符者也懷居與懷利相因者也怠勝敬欲勝義則其心死其學僞吾儕格君其豫在此佐恒衣其德言每察先生端居終日讀書治事之暇未嘗晝寢夜必計過自訟晤卽相告蓋乾乾惕若其真積深矣嘗謝

馳恩騎入吏部堂屬噴有煩言先生將奏其作

威佐謂曰曾記定性書乎人於怒時遽忘其怒先生謝曰吾子督責是也卽焚其草每言曆象古太史職也中星以日爲主七政以歲爲主凡盈虛朏朧伏逆遲留如指諸掌觀望星氣占則必應佐弗能及也其論西山變律謂擴前哲所未發佐謂此乃京房執始變虞之屬耳孰謂不然居二日來曰吾過矣檢漢志果京房律也因言鍾律度量所以治歷明明康節粗得大意而不能建律運歷將舉禮

樂必也周官乎觀大司樂則律歷備矣佐深
韙之惰其著迷散逸茲集特十一爾吾廣方
伯張公鑿學憲張公希舉皆先生鄉人也聞
而欲刻之先一夕佐夢先生來顧語笑如答
懇曰吾文欲刻盍慎擇諸明發而二公果至
於是手自校選定爲五卷於乎先生信神明
矣哉蓋其爲人也其死忠勇其孝感誠其從
善敏其自治嚴其裋身潔其處貧樂故能合
內外貫天人名理如程朱詩文如韓歐而多

所自得使若荆舒之逢時則率典迪而媚嫉
者消矣然則先生進退存亡其爲天下國家
所關係豈細故哉佐於是重有感焉

嘉靖三十年歲次辛夷孟夏朔日

前進士史館友末海隅黃佐頓首拜書

舒梓溪先生文鈔序

梓溪舒公既亡之二十五年學憲來溪張君
哀遺稿若干篇刻之宮端泰泉黃公有友誼
表其志以傳信來世鑿謂公鄉先達也嘗三
復悼歎於公之遺文往事而又以直道爲

國家賀焉因僭附一言嗚呼古之賢人君子以
民物君父爲念凡民物之休戚君父之安且
危機宜利害皆責諸已彼誠見天理之當爲
而無所顧慮然非特立獨行莫之能與也嗚

呼是所謂直道也夫直道世之元氣元氣完則百邪爲能勝古有致理者其體勢敦龐淳固其廟祐尊安歛五兵弭釁逆強臣賊子寢伏畏讟而綿歷千祀恒必由之顯明直道之烈也粵我

皇明

天祚隆厚加以

列聖培植士大夫不安爵祿之酣豢而任綱常倫理至有忠義傑然振世如一峰羅氏可謂

古今一快矣後數十年而公又繼之其遭承名寵旣無不同而批逆鱗瀕於九死大節挺然而相望又何其盛也公學博而行脩自布衣窮居無不可稱說於世嘗悲悼俗學其爲文志意溢發翔出萬物之表而義理淵鬯有紫陽氏之家法焉爲詩好古雅謂流連光景爲無益替人考文者徵實於憂時敢諫其公之謂歟公拜倫魁甫十年再入翰林一謫福建市舶提舉丁內外艱半之享年四十有四

梓溪文鈔
風神王立眉宇英特秀爽遇事侃侃無幾微
矯飾蓋其養之正出之果而非有意必也處
朋友不阿徇有廟切之益尤善成就後學公
既以素所樹立爲天下嚮往其櫛落也天下
方顛顛焉跂踵以俟賴

天子仁聖褒崇弼直凡

先朝所讜言罹罪播遷之臣並見錄用徃徃躋
通顯其播遷而死者亦蒙贈錄而公召復遷
憂阨以終數也文其可無傳乎雖然公之可

傳者豈徒文而已哉而

國家養士與士之爲報抑可謂厚而盛矣故表
言之嘉靖辛夷夏五月朔

賜進士出身奉正大夫廣東布政司左布政使
前奉

勅提督學校浙江按察司副使翰林院庶吉士
郡人張鏊謹序

舒梓溪先生文鈔序

國朝以制科取士得人爲多肇自洪武辛夷迄
今幾二百年歷科五十有八而吾江右魁
大庭者十有六人振藻藝林蜚英槐棘垂休簡
策蓋後先相望也乃若出處之同表著天下
後世則有一峰羅先生倫梓溪舒先生芬焉
一峰之文久已缺行而梓溪之文世未多見
近方刻於廣省宮端泰泉黃公方伯蒙谿張
公旣各爲之序矣顧尚多闕佚先生門人文

峰熊子杰哀集數年復叅廣本於是收錄殆
備予始得縱觀之因思先生與一峰先後同
以敢諫謫官謫且同於閩地閩士民慕其道
德風節而宗之既又同俎豆之矣則刻先生
之文宜在閩乃携入閩臬僭加商訂謀諸學
憲鎮山朱君衡深以爲然而大叅南溪丁君
以忠憲副直軒汪君侏僉憲忠池黎君澄麓
泉徐君光啟皆誼在同鄉均切景仰樂捐俸
而共成之予讀先生制策如董賢良封事如

胡邦衡詩文不獨兼步韓歐而直溯濂洛蓋
博極羣書根據體要爲燦然規世載道之言
其間如論道學則尊濂溪爲中興之聖而不
滿伊川之外師敘周禮則深斥漢儒附會之
非而直責朱子之惑自非確然見理之真毅
然任道之重不惑而不懼者敢謾爲之說耶
是殆發前賢所未發有功於聖人之門豈但
文焉已哉先生於仰觀俯察律曆象數古今
名物無不洞究精微而尤拳拳志在周禮使

梓溪文錄
序
假之以年得立朝行志舉周官法度以翊
聖皇致休治豈非

國家民物之幸顧天奪之早徒使天下後世
景仰其直節昌言之風而齎業志匡時之恨
豈非數耶予生也晚輒於遺文三復悼歎豈
敢序先生之文哉况先生之亡將三十年而
使天下後世人得而仰之凜凜然猶有生氣
如此卽先生之精神塞乎天地有不待言語
文字而存者惟千古而下考德論世亦必有
所徵焉則是集不可無也愷不佞謹述其刻
集顛末以諭四方之景慕先生者云

嘉靖三十二年癸丑春二月甲子

賜同進士出身中順大夫福建按察司副使前
文林郎南京兵科給事中南昌萬虞愷謹序

長垣蔡得源沐手謹書

文正恭公集卷之十

文林被南京兵抄命舉中南昌府知府... 顯同職士出使中郎大夫... 景泰三年... 果腹末... 汝...

舒梓溪先生文鈔序

鄉先正曰舒國蒙氏正德丁丑

為廷試進士首余髫時每得聞

其言論風節於薦紳先生所則

既私心嚮往焉後與先生孫伯

獻同舉於鄉頗為余道先大父志行則益思讀其文以尚論其為人甲戌春余之任閩臬伯獻出其遺文若干卷俾余校而序之余惟閩先生故謫官地也當

其時布德談學多士宗而俎豆之至今則是刻誰不宜於閩哉先生以文學侍從

武宗朝志在國家絕無溫飽念諸所諷議繫社稷經常之重既而

巡幸欲南且編寫先生氣愈勁
言逾厲直陳時事不少避忌以
此竟蒙杖譴時有當事者阻抑
之莫能奪也及

世宗踐祚詔錄前得罪言者先生

台還原官略不為已事悔怵會
有大禮之議復抗疏犯怒杖幾
死余讀漢史至汲長孺好面折
廷諍而淮南寢謀輒廢書歎曰
嗟乎直言之士其道主於匡君

國

也而亦可以弭釁人君用直言之士其功在於拯失也而亦可以建威故士能居常敢諫而後能臨難死義乃自古記之矣我國家運祚昌明培養隆治士大夫

不安酣豢而任細常二百年來有先生與一峰羅氏後先相望於大江之西可謂盛矣先生再杖病創甚尋丁內艱歸踰年病作竟死之之後家無立壁嘗語

人曰心術與學術相符者也懷
居與懷利相因者也急勝敬欲
勝義則其心死其學偽噫心死
則死身死則死等死耳心與身
孰重先生其辨之審矣故自初

仕至死總之甫十餘年中間諫
而杖杖而竄又復諫又復杖百
折不回即死生曾無蒂芥又安
知有可懷之榮利可戚之貧阨
哉先生勇而穎敏貫穿經史百

家雖象緯律曆禮樂名物靡不
洞究而尤精於天文所著有易
箋問東觀錄周禮定奉太極通
書釋義多不下數千萬言徃注
彖前人所未發而尤注意於周

禮嗚乎高年不及艾厯官不過
史懷瑾握瑜齋志以死論者至
今悼之然而讀是編者當知其
心之所以不死也其他操行之
脩潔文章之淵壑與夫世系出

家業以載之狀誌中以故不著
著其大節伯獻名琛即余年友
博古而文能世其家學云

後學南昌漆彬頓首拜書

修撰舒先生傳

武進後學薛應旂撰

修撰舒先生名芬字國裳江西南昌進賢人
也其先世居浙之東陽元大德初有名文英
者始徙進賢之梓溪載傳至溥震溥震生庭
式庭式生法皆積德累行世雖未顯識者已
知其後必有達人法娶聶生先生幼卽岐嶷
峭穎異於凡兒甫成童入郡學嘗作赤鴈賦
郡守奇其才謂當魁天下進賢有石人灘相

傳謂灘合則狀元出人遂以石灘稱先生蓋
期之也先生遜避別號梓溪家貧清苦不與
人羣雖於書無所不讀寔勵志聖賢之學不
屑爲博物洽聞之士端居終日未嘗晝寢夜
必計過自訟晤卽相告每悼俗學之陋嘗曰
吾唯欲出以行志耳不然則聲律對偶之文
可無作也故志爲文氣志渙發理道暢達一
洗回互隱伏支離纏繞之習正德丁卯舉江
西鄉試明年入南太學譽望籍籍祭酒司業
以至六館師生罔不起敬丁丑舉禮闈入對
大廷賜狀元及第授翰林修撰嘗謂古禮樂久
廢恒游心於周禮鍾律無益詩文一切謝去
已卯春權倖江彬等蠱惑

武宗勸之游豫議以三月壬子警道東巡祀岱
宗歷徐揚抵金陵下姑蘇復泝江浮漢登太
和太嶽且徧中土繁麗諸處將相大臣多縱
臾之都下人情洶洶危懼先生乃約諸同志
上疏乞留俱會 闕下吏部尚書陸完迎諸

上疏者曰 主上聞直諫輒引刀爲刎狀今
且撒賴矣其容色詞氣盡歸咎

武宗以沮言者一時言官又多其黨遂爲所沮
先生乃邀吏部郎中夏良勝禮部郎中萬潮
太常博士陳九川舉酒酌之曰匹夫不可奪
志吾輩乃爲大臣所奪乎遂連疏入於是吏
部郎中張衍瑞禮部郎中姜龍兵部郎中黃
鞏孫鳳員外郎陸震刑部郎中陸俸行人司
副余廷瓚等俱連疏入時又有太醫院醫士

徐鏊以醫諫

上大怒車駕亦不果出下黃鞏陸震夏良勝萬
潮陳九川徐鏊於錦衣獄先生與張衍瑞姜
龍孫鳳陸俸等百有七人俱被 命跪午門
外梏拳五日旣余廷瓚等亦下獄黃鞏等六
人亦在午門外梏拳跪五日是時工部主事
林大輅等三人大理寺正周敘等十人亦連
疏入俱下之獄尋亦梏拳跪五日復有金吾
衛指揮張英肉袒戟刃於冑諫數日天色陰

霾京師震駭公卿出入輒被唾罵投擲瓦礫
遂減去跟辦官吏徃徃在昏暗時行乃益謀
蔽惑請 命禮部禁約不許言事通政司遂
格不受疏堂官獻諛者叅劾司屬爲妄言由
是 上怒遂不解戊午水溢內海子四五尺
析橋鉄檻是日先生等一百有七人俱褫衣
廷杖先生以疏首杖特甚神色不異唯口呼
高廟之靈冀以感動 上心杖畢幾斃暴創臥
院中掌院者懼禍使人標出之先生屹不爲

動曰吾官于此當死于此旣而復蘇謫爲福
建市舶副提舉其餘罰俸有差 上怒猶未
解四月巳卯黃鞏諸人亦俱褫衣廷杖林大
輅周敘余廷瓚降級調外任徐鏊戍邊其餘
爲民時死杖下者陸震余廷瓚主事劉校何
遵評事林公輔照磨劉珏行人孟陽李紹賢
劉平甫李翰臣詹軾凡十有一人先生惻惻
嘆曰使余肯從宰臣之沮則諸疏且緩矣今
致諸臣之死芬可以獨生乎聞者感發君子

梓溪文集
傳
謂先生此舉振士氣沮奸謀植風化寔有大
功於世教也辛巳

今上卽位詔起先生適宅父憂嘉靖癸未秋服
除復修撰甲申夏會議大禮先生疏凡三上
伏 闕得罪再杖於廷明年乙酉母太安人
卒于官舍先生扶柩歸由長江至彭蠡忽颶
風鯨波大作先生號顛風濤頓息君子謂誠
孝所感云丁亥春三月疾作十有四日卒距
生成化甲辰三月十有二日年四十有四所

著梓溪集若干卷詞嚴義正如其爲人編輯
周禮定本則尤其所注意也先生平生不事
生業家無立壁巡按江西御史儲良材爲小
築省城居其妻孥子三人忝奉奏奉子琛奏
子璫俱領鄉薦薛應旂曰余管過進賢進賢
士人頌舒先生從事聖賢之學與其歷履比
舊聞加詳恨九原不作不及言從之邁及官
留都太史黃才伯徃徃爲余談成化間羅葵
正劾大臣遭喪起復章德懋黃仲昭莊孔暘

不作應制燈辭皆上疏落職當時謂之翰林
四諫迨

毅皇豫遊時史官敢諫者則唯舒國裳一人矣
吾黨自謂清華獨不念輔導論思之職乎因
出翰林先後姓名授余志之余寡陋因循未
之撰次值有論學者援東漢諸人而擯氣節
然則聖賢固無氣節者邪蓋自正德丁卯逆
瑾讎害戴銑諸人始矯制褫衣受杖死者相
繼又十年己卯再罹此變於是士人漸爲此

論嗚呼此可以觀世道之推移矣余重有感
焉作舒修撰傳

先大父大史公行實

太史公捐館之四十一年是爲隆慶改元

皇帝蒐先朝建言得罪之臣有褒卹典乃琛與

計偕至思我太史公以道鳴世與一峰羅公
同而官止修撰又同羅已謚文毅而我太史
公尚未議謚第欲陳情於

闕下會有禁止之

時禁子孫陳乞

故追敘太史公之行

以俟觀風者採云

太史公

琛

之先大父也姓舒氏諱芬字國裳

初學者稱石灘先生相傳謂石人灘合狀元
出公乃遜不居故學者更稱梓溪先生而公
著書則自號視帶子云太史公生而穎異不
羣凡兒六歲誦詩習禮輒了了大義日博羣
書年十二郡守祝公名瀚字惟容山陰人脩封洫至命
賦駟雁依人頃刻賦成遂大奇之薦補郡博
士弟子督學蔡公名清號虛齋晉江人試輒首選因與
語大悅之輒語人曰此不獨他日大魁天下
士斯道正傳其在茲矣以上出墓誌及本傳以詩經中

正德丁卯鄉試戊辰卒業南雍嘗過夜分不
寐雖於書無所不讀實勵志聖賢之學不屑
為博物洽聞之士最喜濂溪嘗稱之為中興
之聖所著有太極繹義通書繹義又作易箋
問七十餘條書論二十篇詩稗說三十餘條
春秋疑義三十餘篇按太史公與顧順中書云近年所著易箋問七十餘條書論二十篇詩稗說三十餘條春秋疑義三十餘篇後俱散失後六十年琛復得易箋問於朱用晦氏餘訪之竟不得惜哉一時號稱天下士者咸
推讓焉逮丁丑春考官陸文裕公名深號儼山上海人

薦爲元選有他日必爲骨鯁之語主試者抑
居十一名及對

大廷頃刻萬餘言立就而指摘時弊獨切

御批第一甲第一名授官翰林院脩撰時

毅皇帝不時巡幸太史公憂之戊寅春二月

孝貞皇后崩踰月卽欲往視 山陵又革一應

擺路軍馬太史公度其且至宣府遂上隆

聖孝疏謂三年之內當深居 九重無復外出

雖釋服之後儼然皦皦在疚如成王免喪朝

廟之時又謂自古萬乘之尊非奔竄避難未

有輕身而不嚴侍衛者旣而又上車服疏謂

天子等威莫大於車服而下同於庶人甚非所

以辨上下而定禮義也時虞有意外之變故

每疏之中三致意焉又言

孝貞作配 茂陵未聞失德而

祖宗之制 主必於午門昨

孝貞太皇太后之主以從

陛下之駕入於旁門使他日作史者以春秋法

書之曰六月己丑

車駕至自大山陵迎

孝貞純皇后主入長安門則讀者亦必以春秋公薨書地不書地之法求之則

孝貞不得正終之疑不解矣宜

陛下明詔中外以示改過二疏極言天理人欲之分反覆數千言諷諭切至會江西洪水決圩漂舍遂乞恩終養謂臣係獨子無他兄弟父母老疾恐填溝壑辭極悽愴凡五上疏

不允

以上出奏疏

己卯春

車駕議以三月十九日壬子

警道東巡祀岱

宗歷徐揚抵南京下蘇州復沂江浮漢登太和太嶽且遍中土繁麗諸處先是江西宸濠久蓄異謀俟釁而發又結陸完錢寧輩爲內應時

帝星又明於江漢士大夫非忠義素定者輒懷二心以故一聞

駕出人情洶洶懼禍不測將相大臣多縱臾之

皆以為天下之事不可為矣太史公乃慷慨
首義曰車駕出必不利此社稷安危之所
繫也十五日早率同館疏先入時願同諫者
編脩崔公桐
庶吉士汪公應軫曹公嘉王
公廷陳馬公汝驥江公暉乞留駕言甚
激烈有曰痛哭泣血不忍為

陛下言者江右有親王之變宸濠大臣懷馮

道之心陸完以祿位為故物以朝署為市廛

以

陛下為奕棋以革除年間事為故事也復罪刺

閣中謂一切危亡之迹不苦言以救而聽

主上之自壞時完以智術倖高位且將有奪之
者利於

主上遠出則已得以久其位或濠之謀倖遂則
已又有非望之福故造為惡語以沮抑諫者
謂

主上聞直諫便舉刀為劓狀且曰今撤賴矣初
以此沮太史公太史公不聽復以此沮諸司
欲諫者太史公乃邀考功夏公名良勝江
西南城人儀

制萬公名潮江西進賢人太常陳公名九川江西臨川人至寓

舍酌之酒訣之曰匹夫不可奪志吾儕乃為

大臣所奪乎今日之事當死諫無二是夕遂

連疏入時號江西四君子謂首事也楊邃且菴詩曰西江四君子北關幾封章

以告諸同志明日吏部張元承名衍瑞等兵

部黃伯固名鞏陸汝亨名震浙江蘭谿人等刑部陸

天爵名俸等疏俱入又明日禮部姜夢賓名

龍等兵部孫鳴和名鳳等行人司余伯獻名

瓚江西鄱陽人等疏俱入又有太醫院醫士徐鏊以

醫諫乃二十日癸丑

天威震怒命舒芬等百有七人於午門外跪五

日未辰而入終酉而退復有金吾衛指揮張

英以是為變故明效乃肉袒戟刃於胸以死

諫數日天色陰霾京師震駭公卿出入輒被

唾罵投擲瓦礫遂減去跟辦官吏徃徃在昏

暗時行奸無所容益謀蔽惑請命禮部禁約

不許言事通政司遂格不受疏堂官獻諛者

叅劾司屬為妄言由是

上怒遂不解而車駕亦不果出向使太史公
爲陸完沮則夏萬之疏且緩諸公之氣亦衰
矣安得此舉以制

主上之行哉

以上出李
崇德基誌

乃二十五日戊午命

舒芬等於午門前褫衣杖三十公以疏首杖
特甚神色不喪惟口呼

高廟之靈冀以感動

上心是日水溢內海子四五尺至不了橋衝折
鐵檻大柱七根若斬然杖畢幾斃臥院中掌

院者懼禍至使人標出之太史公屹不爲動
曰吾官於此當死於此又命爲首者調外

任遂謫福建市舶副提舉

羅一峰劾大臣遭
喪起復亦謫此官

太史公此謫正同其地比奔喪歸閩士
人宗其道德風節乃立祠以祀二公云卽暴

瘡就道或勸俟痊曰死吾分也敢少留邪是
時死而復甦遠近相傳爲野祭有一峰之後

見先生之語

此段出黃
泰泉序

旣至閩講學不倦生

徒日衆且布德宣威遠夷心服六月十四日
江西宸濠果稱兵謀反俄而伏誅季秋九日

動登高思偕年友遊烏石板崖撫岑長嘯孤
詠或倡或和以竟此日越十日又至各爲詩
若干首屬太史公和且錄之以記遊太史公
曰屈子作離騷人謂忿怨嫉世遜虛非知屈
子者古仁人立言深遠余何敢也集成有三
山紀會錄庚辰閏八月野江翁棄養於家太
史公聞訃慟絕兼程而歸歸則哀毀骨立事
事循朱子家禮時鄉多寇有請避居者曰寒
士何以憂寇堅立不易辛巳夏

世宗卽皇帝位肆赦諸竄謫者皆

詔起會宅憂癸未服闋應

詔復官翰林道濟入謁

先師行釋菜禮周歷宮宇壇場堂閣覽山川勝

槩徘徊數日若深有得因錄所撰謁闕里記

所畫闕里圖所貌入聲夫子宮墻圖所行釋菜

禮儀及士相見禮儀并問荅五章聯句三十

五韻總題曰東觀錄時吏部欽依

詔書例陞俸一級太史公上辭陞俸級疏六月

奏請

勅命遂得 賜恩又進太史公階儒林郎降

勅褒之甲申春二月

昭聖慈壽皇太后聖旦節太史公上乞 命命

婦朝賀疏謂

皇太后奉

陛下宗社大計而

陛下承繼大統觀夫成王周公儀禮經文與我
太祖制服之意則是

陛下於

皇太后雖欲疏之有不能者是宜率天下懽心
以事其

親而不可使

皇太后之淒涼也三月乞致仕以圖便養疏再
上不允洎夏又再上不允又乞改選以便養
又不允時

世宗欲尊

興獻王爲皇帝爲皇考

命下羣臣議大禮太史公執議謂爲人後者爲
之子不得顧私親疏凡三上固爭不得乃率
朝紳慟哭於

左順門

皇帝震怒杖如前幾死罰俸三箇月時奉太安
人聶氏就養明年乙酉太安人卒於京師官
舍請

命扶柩南還行李蕭然抵家三月而塋生平酷
好周禮詳加訂正作五官序辨五卷六官圖

釋一卷剔僞一卷旣乃校定正經仍六卷總
之十有三卷題曰周禮定本謂周禮者至誠
盡性之書也門人魏公良貴刻又嘗修三禮
書未幾太史公辭世使天假之年得立朝
行志舉周官法度翊

聖皇致休治不難矣嗚呼痛哉

此段出本傳

太史公

幼卽穎拔日記數千言貫穿經史百家之旨
於凡仰觀俯察律曆象數古今名物無不洞
究其奧而於天文尤精每言曆象古太史職

也中星以日為主七政以歲為主凡盈虛朏
朧伏逆遲留如指諸掌觀望星氣有占必應
雖同館號知天文如黃泰泉名佐香山人者亦自
以爲不及也又言鍾律度量所以治曆明時
康節粗得大意而不能建律運曆將舉禮樂
必也周官觀大司樂則律曆備矣識者韙之
此段出黃泰泉序其博文有如此者七歲能詩十二
工賦論議必析其衷感時乃見乎志至于大
或千言少僅數語志意溢發翔然於萬物之

表而多所自得若制策封事雖董賢良胡邦

衡不能過焉此段出張蒙溪萬楓潭序其文章有如此者

端居終日未嘗晝寢夜必計過自訟晤卽相

告出黃泰泉序凡視聽言動必準諸禮而不敢少

失尺寸嘗語同館友曰心術與學術相符者

也懷居與懷利相因者也怠勝敬欲勝義則

其心死其學僞吾儕格君其豫在此出黃泰泉序

謂太極圖亦則河圖與伏羲同功而不滿先

儒本於易之說謂濂溪得斯道之正脉而直

責程正叔之外師至於周禮一書嘗責漢儒多附會之罪宋儒乏表章之功謂周禮之與儀禮戴記猶蜀之於吳魏也賈氏以儀禮爲本周禮爲末謬妄已甚朱子乃不正之是其所惑也出太極釋義周禮定本至於五經嘗疏論數萬言闡其幽趣大抵皆有功于聖門而周禮尤爲有賴也非確然見道之真者能然邪出楓潭序其理學有如此者少擢倫魁初不色喜繼謫閩舶了無愠容嘗獨立敢言瀕於九死不撓

不懼至謝

馳恩騎入吏部堂屬噴有煩言公將奏其作威

友人曰人於怒時遽忘其怒公即焚其草出泰

泉序其性情之正有如此者居常溫清定省出

於誠篤每聞庭訓則敬而守之惟恐行之不

逮比列侍從即委身於國曰此太史公教也

一聞洪水之災高堂之疾前後陳乞終養無

慮十數疏至於以犯顏諍

君爲悅親之實以不愧屋漏爲無忝所生之實

其事親之孝有如此者忠諫

兩朝先後一節凡宗社大計如諫南綱常大禮巡之類

如議大禮之類勤勤懇懇言之言則必要諸聖賢之

大道而不敢以末世苟且之說雜焉其事

君之正有如此者通籍十年義氣激烈諫而杖

杖而竄又復諫又復杖而絕無一毫得失之

心死生利害之念宅憂數年非公事未嘗一

入有司之室時有欲居以官屋而免其直者

辭曰我世惟清白何用此為先時吾野江翁

卜葬地諸君授以桃花嶺向固不敢以此累

先人今又何敢以此累子孫哉竟不受其安

義命之正有如此者幼即以聖賢自期嘗曰

吾惟欲出以行吾志爾不然則聲律對偶之

文可無作也又悼異學之謬曰是大亂真而

善溺人者也空言闢之無益亟脩其本以勝

之因取周子學聖有要數語書之座右顧諱

而力行之曰此可以遡洙泗之源矣此可以

得勝異之本矣又曰退之雖不信佛然何必

與太顛遊故於削髮之流羽衣之客悉毅然
疾之不示半面至於權倖奄宦之輩卽有善
求通者絕之亦如釋老焉其守道之正有如
此者居閩未幾適奔父喪琉球國人自長史
金爵而下莫不哀號追送出辭扶母喪入江
忽雲垂波立舟楫危甚亟爲文籲祭風濤頓
息旣而阻風又爲文祭小孤神風遂得順祭有
揚子江文祭小孤神文刻集其精誠感格有如此者與朋
友相劇切無幾微矯飭尤善成就後學出蒙
溪序

與之講論事理而惓惓於心術之正嘗語之
曰爵祿不入於心溝壑不忘於念以故門下
之士恪守其教多爲世名卿其教人之正有
如此者居疾中禮度毫髮不踰凡相見者必
勉之學且曰聖人可學而至臨終沐浴欲自
告於廟時家廟稍遠兄弟子姪恐出有不利
固留乃止命長子泰往禮禮畢歸命復與衆
楫日連日多勞時入室少坐曰此非廳也卽
徑行出廳自整衣冠端凝不動長子泣問疾

不荅問家事不荅跪請所欲言乃瞪目謂曰
六經大明於世惟周禮未獲表章予生平精
力用在此書近年重加校訂幸成全經知我
罪我我不敢知第未及

進爲歉爾爾其無忘乃父之志言畢而逝其臨
終從容以正有如此者

肅皇帝有精醇端介之褒有文魁天下賢名大
振之褒有陳仁義格君心之褒楊相國名一清號
邃諸公則稱之爲忠孝狀元焉至儕之伊洛
菴

之賢則又泰泉先生之斷也直道扶 國家

之元氣論議發前賢之未發又張名整號萬

名虞愷號楓潭二公之論也凡海內士聞太史公之

風者皆曰今之羅一峰而著述過之其見於

公評有如此者琛聞之禮曰先祖有美而弗

知不明也知而弗傳不仁也琛爲此懼故謹

敘太史公言行之實於右然以子孫而稱揚

先人或者又嫌於私而疑之矣故琛惟據本

傳墓誌及諸名公之贈言而有關於言行之

大者則謹書之而不敢加一字焉間有一二
聞於父兄而爲鄉黨所共知者亦謹書之又
不敢以爲嫌而故遺之也世之
仁人君子其尚鑒之也哉

隆慶元年丁卯冬日不肖孫

琛

泣血謹狀

先大父梓溪內外二集舊有福泉鏤板蓋先
兄伯獻丞泉郡時刻也出處行實詳先兄敘
述中時不肖琛在舞象之年不獲附校讐之
役用是赧然愧嗣後

聖天子念先朝理學忠節之臣從

大宗伯鳳阿姜公龍江沈公之請賜太史公謚

文節而不肖業已粗知文字于時讀太史公

之文而想太史公之節因太史公之節而益
重太史公之文精英勃勃浮動楮墨間用是

躍然慕越廿餘載而福板竟以回祿燬嗟乎
寄寶于人取不越宿天不欲使靈異之物久
駐人間耶因竊念衣冠噐具先代所藏尚珍
襲之以昭世守矧乃出自肝腸肺腑中物而
煨燼置之其于祖述之義謂何用是痛心疾
首凜凜遺文之隕越是懼會當承乏覲

京師謀之比部樊公重加訂正而付之剞劂
是時也遼餉告急鄭土頻饑議捐議賑之餘
月俸錢不足飽其孥以故繕寫模印逡巡停

閣者久之踰年而始竣事嗟乎淵源可溯留
一綫以示來茲我文節公之寵靈寔是式憑之
雖復沒齒蕭然亦何憾之與有至若先太史
學識之精醇性資之端介則有國史之紀錄
與先輩名家之傳敘在不肖瑛何敢贅焉敬
九頓識簡末就正當世有道君子

告

萬曆庚申六月朔

不肖孫瑛

稽首謹識

舒梓溪文鈔目錄

外集十卷

卷一

制策一道

卷二

表一首

奏疏七首

卷三

序三十首

卷四

序二十九首

卷五

記十一首

卷六

家譜七首

卷七

墓誌碣銘五首

墓表三首

卷八

書十七首

傳三首

卷九

祭文九首

贊三首

銘三首

箴五首

說三首

辨一首

跋三首

書二首

論二首

策一首

卷十

賦二首

樂府五首

四言古詩八首

五言古詩十一首

長短句古詩五首

五言律詩二十六首

七言律詩一百一首

五言絕句十九首

七言絕句二十五首

雜體二首

聯句二十八首

內集八卷

卷一

易箋問

卷二

太極繹義上

太極繹義下

卷三

通書繹義

卷四

東觀錄

卷五

周禮定本一

周禮定本二

周禮定本三

周禮定本四

周禮定本五

五官敘辨

卷六

周禮定本六

六官圖釋

卷周禮定本七

周官別偽

卷七

周禮定本八

周禮定本九

周禮定本十

周禮正經

卷八

周禮定本十一

周禮定本十二

周禮定本十三

周禮正經

文鈔目錄 畢